



## Observasaun hosi Fundasaun Mahein kona-ba Realizasaun Programa 120 Dias ba Setor Seguransa IX Governu Konstitusional

Mahein Nia Lian Nú. 159

23 Novembru 2023



*Photo Governu Timor-Leste, 2023*

Fundasaun Mahein (FM)  
Website: [www.fundasaunmahein.org](http://www.fundasaunmahein.org)  
2023

## Konteudu sira

Introdusaun	3
Defeza Nasional no F-FDTL	3
Seguransa Interna no PNTL	4
Intelijênsia	5
Justisa no Investigasaun Kriminal	6
Arte-marsiais no rituais	6
Konkluzau	7
Bibliografia	8

## Introdusaun

Relatóriu ne'e Fundasaun Mahein (FM) hakarak fahe ninia observasaun kona-ba implementasaun programa 120 Dias mandatu IX Governu Konstitusional. Hosi komprimisiu 12 Programa 120 Dias ba Governansaun da IX nian, komprimisiu ida maka "konsolidasaun paz no seguransa ne'ebé nesesariu ba dezvoltamentu nasional, hodi garante sidadaun hotu-hotu nia direitu, dever, liberdade no garantia fundamental sira"<sup>1</sup>.

Nune'e relatóriu observasaun ida ne'e konsentra deit ba Programa 120 Dias ba institusaun setor seguransa sira hanesan Ministériu Defeza, FALINTIL-Força de Defesa Timor-Leste (F-FDTL), Ministériu Interior, Polícia Nacional de Timor-Leste (PNTL), Serviço Nacional de Inteligência (SNI), Polícia Científica de Investigação Criminal (PCIC) no asuntu sira liga ho justisa no seguransa nasional.

## Defeza Nasional no F-FDTL

### 1) *Ministru Defeza hanesan mos Eefetivu F-FDTL*

Iha loron 18 Jullu 2023 liu hosi Dekretu Prezidente Repúblika N.º 63/2023 exonera ona Comodoro Pedro Klamar Fuik hosi cargo Chefe Estado Maior F-FDTL no nia efeitu hahu hosi loron 30 Juñu 2023<sup>2</sup>. Tamba nomeia ba Ministru Defeza iha IX Governu Konstitusional no simu pose iha loron 1 Jullu 2023. Maske nune'e, iha loron 25 Outubru 2023 Ministru Defeza Pedro Klamar Fuik ko'alia ba media Timor Post katak nia seidak sai hosi forsa defeza Timor-Leste no bainhira mandatu ramata sei fila-fali ba F-FDTL hala'o kna'ar profesional hanesan militar.

Tuir pratika iha rai demokratiku sira, forsa profesional la hola parte iha funsaun polítika. Nune'e mos rekomendasaun CAVR (*Chega!*) katak ita (Timor-Leste) labele repete hahalok sira hosi pasadu funu-maluk halo iha Timor-Leste inklui forsa armada labele hola parte funsaun moris polítika nian. Hanesan exemplu ida, iha administrasaun *Regime Orde Baru* Indonézia nian iha tinan 1998 ba kotu, Chefe Estado Maior General Forsa Armada Indonézia nian (*PANGLIMA ABRI*) hanesan mos Ministru Defeza no Seguransa (*Menteri Pertahanan dan Keamanan*).<sup>3</sup>

### 2) *Proposta auto-promosaun*

Iha loron 5 Jullu 2023 Ministru Defeza Pedro Klamar Fuik apresenta iha reuniaun Konsellu Ministru kona-ba proposta auto-promosaun ba Posto Contra-Almirante. Konsellu Ministru hato'o proposta auto-promosaun ne'e ba Prezidente Repúblika no depois konsulta ho Konsellu Superior Defeza no Seguransa. Ikus mai promove liu hosi Dekretu Prezidente Repúblika N.º 64/2023 loron

---

<sup>1</sup> Komprimisu 12 Programa 120 Dias ba Governansaun da IX.

<sup>2</sup> DECRETO DO PRESIDENTE DA REPÚBLICA N.º 63/2023, 18 de Julho. PROMOÇÃO DO COMODORO DONACIANO DO ROSÁRIO DA COSTA GOMES (PEDRO KLAMAR FUIK) PARA O POSTO DE CONTRA-ALMIRANTE.

<sup>3</sup> Relatóriu CAVR (*Chega!*), 2005.

18 Jullu, hosi Posto Comodoro ba Posto Contra-Almirante. Promosaun ne'e nia efektu hahu hosi loron 30 Juñu 2023<sup>4</sup>.

## **Seguransa Interna no PNTL**

### **3) Reativasaun ka reintegrasaun ilegal ba membru PNTL ne'ebé reforma ona**

IX Governu Konstitusional liu hosi Ministériu Interior reeve apozentasaun ba membru PNTL 158 ne'ebé hala'o iha mandatu VIII Governu Konstitusional. Iha ne'ebé IX Governu Konstitusional konsidera nu'udar "prosesu ilegal ba apozentasaun forsada elementus PNTL 158". Durante mandatu Governansaun da IX nia Programa 120 Dias reintegra liu hosi Rezolusaun Governu N.º 43/2023 de 4 de Outubro. Reintegrasaun ida ne'e sai polêmika no Provedoria Direitos Humanos e Justiça (PDHJ) husu ba Tribunal Recurso halo fiskalizaun abstrata ba apozentasaun ka reformadu membru PNTL 158. Akordaun Tribunal Rekursu nian loron 26 Outubro 2023 notifika katak la iha inkonstitusionalidade ba prosesu apozentasaun ka reforma ba membru PNTL 158<sup>5</sup>. Tamba ne'e FM husu Governu tenke respeita prosesu legal ne'ebé Tribunal Recurso notifika ona ba Governu no PNTL.

### **4) Forsadamente obriga atu halo juramentu ba membru PNTL no F-FDTL ne'ebé envolve iha arte-marsiais no rituais**

Violênsia iha Munisipiu sira hanesan Baucau, Bobonaro, Covalima, Dili, Lautem no Viqueque, parte hotu julga katak violênsia hirak ne'e ligasaun mai hosi grupu arte-marsiais no arte rituais. Tamba ne'e, IX Governu diside suspende atividade arte-marsiais no rituais. Nune'e mos membru PNTL no F-FDTL balun sai kulpadu ba violênsia hirak ne'ebé ligadu ho grupu arte-marsiais no rituais. IX Governu Konstitusional ho forsa sei obriga halo juramentu ba membru PNTL no F-FDTL ne'ebé envolve iha arte-marsiais no rituais iha seremonia aniversariu Proklamasau Independensia Timor-Leste nian iha loron 28 Novembru 2023.

Primeiru-Ministru, Ministru Interior no Ministru Defeza iha ona esperiensa kona-ba juramentu ba membru PNTL no F-FDTL ne'ebé envolve iha arte-marsiais no rituais iha tinan 2015. Juramentu refere hala'o iha Palasiu Governu. Maibe nafatin la prevene violênsia entre grupu arte-marsiais no rituais, no la prevene membru PNTL no F-FDTL envolve (ka membru Governu seluk) envolve-an iha grupu refere.

FM aseita ho Governu katak "membru PNTL ne'ebé jura ona atu serbí partidu balu atu dada-an hosi lasus juramentu ka sai husi PNTL" durante mandatu VIII Governu Konstitusional nian. Tuir monitorizasaun FM nian no durante tinan 2020-2023, FM alerta beibeik kona-ba hapara politizasaun ba PNTL<sup>6</sup>. Iha ne'ebé promesa promosaun diviza no kargu, tenke ho juramentu ba

<sup>4</sup> DECRETO DO PRESIDENTE DA REPÚBLICA N.º 64/2023, 18 de Julho. PROMOÇÃO DO COMODORO DONACIANO DO ROSÁRIO DA COSTA GOMES (PEDRO KLAMAR FUIK) PARA O POSTO DE CONTRA-ALMIRANTE.

<sup>5</sup> Tribunal de Recurso. Proc. n.º 04/CONST/2023.TR. NUC: 0076/23.TRDIL

<sup>6</sup> Vice-Ministru Interior Kontinua Politiza Setor Seguransa. Disponivel iha ne'e:

<https://www.fundasaunmahein.org/2021/09/27/vice-ministru-interior-kontinua-politiza-setor-seguransa/>

partidu polítiku balu ne'ebé envolve hosi membru PNTL. Komportamentu ida ne'e tenke kurize tiha ka tenke hasai hosi PNTL. Nune'e bele promove valór bo'ot kona-ba integridade, profesionalizmu, izensaun polítika ka partidária.

## **Intelijênsia**

Hanesan temi iha diskursu Primeiru-Ministru Xanana Gusmão nian iha seremonia pose ba membru Governu IX Governu Konstitusional kona-ba “reforma no reestrutura SNI”. Diskursu ida ne'e realiza iha Programa 120 Dias mandatu Governasaun IX Governu Konstitusional. Iha ne'ebé Primeiru-Ministru liu hosi Despacho n.º 005/GPM/IX/2023 exonera Diretor-Geral SNI Coronel Domingos da Camara “Amico” no Diretores-Gerais Adjuntos SNI na'in rua iha loron 1 Setembru 2023.

### **5) Nomeasaun Diretor-Geral SNI ne'ebé envolve iha kazu armas ilegais**

Iha loron 1 Setembru 2023 Primeiru-Ministru liu hosi Despacho n.º 006/GPM/IX/2023 nomeia Longuinhos Monteiro ba Diretor-Geral no Egas Moniz ba Diretor-Geral Adjuntu SNI. Nomeasaun Longuinhos Monteiro ba Diretor-Geral SNI sai polêmica bo'ot iha sosiedade Timor-Leste tamba ninia envolvimentu iha kazu armas ilegais ne'ebé subar iha ninia uma Loes Munisipiu Liquiça no Fomento – Dili. Kazu armas ilegais ne'ebé envolve atual Diretor-Geral SNI, Ministériu Públiku submete ona ba Tribunal<sup>7</sup>. Maibe to'o agora iha nonok nia laran no lahatene to'o bainhira Tribunal halo julgamentu ba kaze refere.

### **6) Nomeasaun Diretor-Geral Adjuntu SNI ne'ebé deskonfia envolve iha krime pekulatu, abuzu poder no fraude fiskal**

Iha Programa 120 Dias ne'e, Premieru-Ministru nomeia fila-fali antigu Diretor-Geral Adjuntu SNI Egas Moniz ba kargu refere. FM nia observaun kona-ba nomeasaun ne'e, Diretor-Geral Adjuntu SNI atual deskonfia envolve mos iha kazu krime pekulatu, abuzu poder no fraude fiskal ho NUK 0274/22.PCCIC durante nia kaer funsaun hanesan Diretor-Geral Adjuntu iha tinan 2021 ba kotuk.

### **7) Publikasaun ba informasaun klasifikadu sira**

Hetok grave liu-tan, liu hosi Depacho Primeiru-Ministru nian, Despacho N.º 09/GPM/X/2023 ne'ebé pública iha Jornal da República iha loron 13 Outubru 2023 no disponivel mos iha plataforma online Jornal da República nian<sup>8</sup>. Iha ne'ebé, Primeiru-Ministru fó ordem ba SNI halo operasaun intelijênsia iha postu integradu fronteira, hodi apoiu supervizaun no koordenasau atividade sira iha sentru integradu iha âmbito Sistema Integradu Seguransa Nasional (SISN). Públikasaun ba Despacho N.º 09/GPM/X/2023 nu'udar violasaun grave ba Lei N.º 9/2008 de 2 de Julho Sistema Nacional de Inteligência da República Democrática de Timor-Leste no Decreto-

<sup>7</sup> Timor Post, 17 Novembru 2023

<sup>8</sup> Primeiru-Ministru – Despacho N.º 09/GPM/X/2023. Asesu iha ne'e: [https://www.mj.gov.tl/jornal/public/docs/2023/serie\\_2/SERIE\\_II\\_NO\\_41\\_A.pdf](https://www.mj.gov.tl/jornal/public/docs/2023/serie_2/SERIE_II_NO_41_A.pdf)

Lei N.º 3/2009 de 15 de Janeiro Serviço Nacional de Inteligência. Iha ne'ebé atividade hotu-hotu SNI nia Klasifikadu no nu'udar Segrdu Estadu.

## **Justisa no Investigasaun Kriminal**

### **8) Exonerasaun ba Adjuntu Diretor PCIC no Governu mantein Diretor PCIC ne'ebé tuir lolos tenke exonera imediatu hosi nia kargu**

FM nia monitorizasaun durante mandatu 120 Dias IX Governu Konstitusional exonera Adjuntu Diretor PCIC Adino Cabral. Exonerasaun ida ne'e la iha fundamentu no karik tamba iha mandatu Adjuntu Diretor PCIC lidera operasaun no investigasaun ba kazu armas ilegais iha Loes-Liquiça no Fomento-Dili? Tuir FM nia monitorizasaun lolos Governu tenke exonera maka Diretor PCIC tamba fasilita fó armas ba nia oan-mane ba tiru iha fatin treinu PCIC nian iha Liquiça. Nune'e mos kazu sira seluk ne'ebé akontese iha PCIC nia laran, hanesan FM fó sai ona iha relatóriu dahuluk<sup>9</sup>. Kazu ida ne'e FM preokupa tebes no iha prosesu legal hasoru Diretor PCIC ne'ebe autoriza nia oan-mane tiru armas PCIC nian iha Liquiça. Tuir FM nia observasaun akontesimentu sira iha interna PCIC nian akontese tambá fator oin-oin hosi lideransa PCIC nian, liu-liu inkapasidade lideransa PCIC nian hodi impoen lei no regulamentu sira no halo servisu la imparcial no diskrimina hasoru ninia subordinadu sira iha oportunidade sira ba formasaun no treinamentu.

### **9) Intervensau ba desizaun Tribunal**

Durante 120 Dias mandatu IX Governu Konstitusional, Primeiru-Ministru halo intervensau ba desizaun Tribunal kona-ba kazu rai iha Bekuse-Becora – Dili. FM nia observasaun intervensau hosi Primeiru-Ministru la kontribui atu dezenvolve prinsipiu *Estado do Direito e Democrático* maibe hamosu presedente ne'ebé haburas liu-tan atetude ema la respeita Lei, no hahi liu maka poder. Tamba respeita Lei no desizaun Tribunal nu'udar fundamentu prinsipal ba moris demokrasia. Poder ne'ebé hetan hosi povu tenke hala'o tuir lei, la'os tuir fali forsa ida-idak nian hakarak.

## **Arte-Marsiais no Rituais**

### **10) Suspensau ba arte-marsiais no rituais**

Hosi total 54 insidentes ne'ebé rejista, ema sira ne'ebé mate hamutuk na'in-4 no kanek todan na'in-26 ho tan danos (ka estragos) ba sasán hanesan uma 21 no veículos (kareta no motor) 10. Nune'e iha loraon 8 Novembru 2023 IX Governu Konstitusional liu hosi Konsellu Ministru aprova Rezolusaun Governu N.º 45/2023, loraon 10 Novembru, Determina Suspensau kona-ba Ensinu, Aprendizajen no Pratika Arter-Marsiais ho Adosaun (ka foti) Medidas hodi Asegura Ordem Públika.

---

<sup>9</sup> Fundasaun Mahein (2023). Halo Investigasaun Kle'an hodi Aselera Processo Reforma ba PCIC. Disponivel iha ne'e: <https://www.fundasaunmahein.org/2023/10/05/halo-investigasaun-klan-hodi-aselera-processo-reforma-ba-pcic/>

FM nia monitorizasaun, IX Governu Konstitusional ne'ebé lidera hosi Primeiriu-Ministru Xanana Gusmão no Ministru Interior Francisco Guterres iha ona esperiensa kona-ba suspensaun no extinsaun ba arte-marsiais no rituais hosi tinan 2008 to'o 2017<sup>10</sup>. Iha ne'ebé suspensaun no extinsaun la rezolve violênsia sira ne'ebé ligadu ho grupu arte-marsiais no rituais. Hetok durante suspensaun no extinsaun atividade klandestina ensinu, apredizajen no pratika arte-marsiais no rituais kontinua la'o. Nune'e mos la prevene ka la rezolve violênsia sira ligadu ho grupu arte-marsiais no rituais.

Tuir FM nia haree, problema violênsia entre gurpu arte-marsiais no rituais la'os deit kestaun grupu, maibe problema estrutural sira ne'ebé promove violênsia iha sosiedade, liu-liu falta prezensa Estadu nian, falta kampu traballu, falta edukasaun formal, no falta polítika atu garante partisipasaun juventude iha prosesu dezenvolvimentu.

Tuir lolos Governu liu hosi Comissão Reguladora Arte-Marciais (CRAM), PNTL no líderes komunitaria kontrola no akompania ho rigor ba atividade arte-marsiais maka solusaun hodi orienta arte-marsiais fila-fali ba nia origem no prevene violênsia sira ne'ebé ligadu ho grupu arte-marsiais no rituais, la'os suspensaun no taka ka extinsaun. Aliened ne'e, Governu presiza kria planu integradu hodi garante joven sira nia partisipasaun iha prosesu dezenvolvimentu sira, inklui fasilidade ba joven, oportunidade ba formasaun no edukasaun, no kampu traballu iha rai-laran. Kleur ona, FM lamenta falta Política Juventude Nasional ida ne'ebé iha garante katak joven Timor-oan sira hotu bele participa ho masimu iha prosesu dezenvolvimentu nasional. Atu nune'e bele garante paz, estabilidade, no dezenvolvimentu ekonómiku ne'ebé inkluzivu.

## **Konkluzau**

Konklui katak iha setor seguransa nian, FM identifika iha programa sanolu (10) maka IX Governu Konstitusional realiza durante mandatu 120 Dias ne'ebé ligadu ho juramentu, polêmika, iregularidade, impunidade, inkonstitusionalidade nomos intervensaun ba disizaun Tribunal nian. Nune'e mos repete esperiensa sira ne'ebé iha tinan hirak liu ba halo ona no la prevene ka la rezolve violênsia sira ligadu ho grupu arte-marsiais no rituais.

Bainhira modelu Governu ne'ebé nakonu ho ema sira ne'ebé envolve iha kazu no deskonfia envolve iha kazu, kontinua nomeia lidera iha istituisaun Estadu nian. Ida ne'e sei dezakredita institusaun nia prestasaun servisu no harahun públiku nia fiar ba instituisaun Estadu. Nune'e mos intervensaun polítika ba setor justisa no seguransa, sei la kontribui ba dezenvolvimentu nasional nomos hanesan ameasa ba seguransa nasional.

---

<sup>10</sup> RESOLUÇÃO DO GOVERNO N.º 16 /2013 de 10 de Julho, Extinção de Grupos de Artes Marciais

## Bibliografia

- Fundasaun Mahein (2023). Halo Investigasaun Kle'an hodi Aselera Processo Reforma ba PCIC. Disponivel iha ne'e: <https://www.fundasaunmahein.org/2023/10/05/halo-investigasaun-klan-hodi-aselera-processo-reforma-ba-pcic/>
- Fundasaun Mahein (2021). Vice-Ministru Interior Kontinua Politiza Setor Seguransa. Disponivel iha ne'e: <https://www.fundasaunmahein.org/2021/09/27/vice-ministru-interior-kontinua-politiza-setor-seguransa/>
- DECRETO DO PRESIDENTE DA REPÚBLICA N.º 63/2023, 18 de Julho. PROMOÇÃO DO COMODORO DONACIANO DO ROSÁRIO DA COSTA GOMES (PEDRO KLAMAR FUIK) PARA O POSTO DE CONTRA-ALMIRANTE.
- DECRETO DO PRESIDENTE DA REPÚBLICA N.º 64/2023, 18 de Julho. PROMOÇÃO DO COMODORO DONACIANO DO ROSÁRIO DA COSTA GOMES (PEDRO KLAMAR FUIK) PARA O POSTO DE CONTRA-ALMIRANTE.
- DECRETO DO PRESIDENTE DA REPÚBLICA N.º 76/2023 de 15 de Agosto. PROMOÇÃO AO POSTO DE MAJOR-GENERAL.
- DECRETO DO PRESIDENTE DA REPÚBLICA N.º 77/2023 de 15 de Agosto. PROMOÇÃO AO POSTO DE MAJOR-GENERAL.
- DECRETO DO PRESIDENTE DA REPÚBLICA N.º 78/2023 de 15 de Agosto. PROMOÇÃO AO POSTO DE MAJOR-GENERAL.
- DECRETO DO PRESIDENTE DA REPÚBLICA N.º 79/2023 de 15 de Agosto. PROMOÇÃO AO POSTO DE BRIGADEIRO-GENERAL.
- DECRETO DO PRESIDENTE DA REPÚBLICA N.º 80/2023 de 15 de Agosto. PROMOÇÃO AO POSTO DE COMODORO.
- IX Governu Konstitusional – Komprimisu 12 Programa 120 Dias ba Governasaun da IX.
- Primeiru-Ministru – Despacho n.º 005/GPM/IX/2023
- Primeiru-Ministru – Despacho n.º 006/GPM/IX/2023
- Primeiru-Ministru – Despacho N.º 09/GPM/X/2023. Asesu iha ne'e: [https://www.mj.gov.tl/jornal/public/docs/2023/serie\\_2/SERIE\\_II\\_NO\\_41\\_A.pdf](https://www.mj.gov.tl/jornal/public/docs/2023/serie_2/SERIE_II_NO_41_A.pdf)
- Resolução do Governo N.o 43/ 2023 de 4 de Outubro Reativação do pessoal com funções policiais da Polícia Nacional de Timor-Leste
- Rezolusaun Governu N.º 45/2023, loron 10 Novembru, Determina Suspensaun kona-ba Ensino, Aprendizajem no Pratika Arter-Marsiais ho Adosaun (ka foti) Medidas hodi Asegura Ordem Públika.
- RESOLUÇÃO DO GOVERNO N.º 16 /2013 de 10 de Julho, Extinção de Grupos de Artes Marciais
- Tribunal de Recurso. Proc. n.º 04/CONST/2023.TR. NUC: 0076/23.TRDIL